

四庫全書

集部

欽定四庫全書

可齋雜藁卷二十八

宋 李曾伯 撰

七言律詩

丙子登峴山

漢江為帶楚山維多少興亡此地知
萬里邊風寒故壘
千年隴月老殘碑
塵迷栢土龍根幻
水遶檀溪馬骨悲
舉世豈無羊叔子
草萊猶未起男兒

宿江州藥王寺

指點烟林正午鐘
亭亭樓閣有無中
鋪張翠蓋松間日
掃洒紅塵竹外風
啼鳥不驚禪入定
落花無跡色成空
解鞍暫作今宵歇
恰與雲堂旦過同

壬午昌化道間

暑雨祁寒路兩經
二童一馬影鈴聲
簷花夜滴溪添綠
雲葉暮橫山減青
窮笠芒鞋今古道
竹籬茅店短長亭
未妨老子登臨興
解却征鞍且暫停

過廬山

問訊匡廬幾度經何時袖手摘天星世如春夢空頭白
山似故人終眼青便欲移文尋鶴帳又還呼渡過鷗汀
它年學得香山士定結茅庵入翠屏

寧國道間喜晴

怪得虛簷寂溜聲起來雲淡月微明只消一夜西風力
盡掃千山宿露清農舍少酬終歲望客途擬過小春晴
枝禽亦似欣意飛入烟林自在鳴

寧國道間即事

楓染酖顏菊亦酣
霜天風味飽相諳
馬蹄去去江之北
雁影來來塞以南
雲外數峯輕抹翠
雨餘一水碎按藍
肩輿催問誰家宿
落日西山已半含

蜀江和周昞仲百丈韻

欲知峽路打灘渦
千尺蒼筠用力多
進退不煩篙影動
東西惟聽柁師呵
命垂一縷惟天耳
力挽千鈞如水何
爭似錢塘江上路
夜深柔櫓聽吳歌

和周昞仲過踏洞灘

堪憐瀆淖上舟難爭似山坳住舍安雷鼓喧呼人挽纜
風鬟笑語女盤灘倦憑林酒生春思愁怯衾裘禦夜寒
多謝新詩慰牢落燈前一笑病懷寬

題雙廟鎮峽樓

峯巍巖柱疑媧立地峻龍門自禹開山色半昏朝欲雨
灘聲不輟夜何雷雲屏烟障相迎送沙鳥風檣幾去來
徙倚闌干不知倦一詩彈壓愧非材

題孔明白帝二祠

過夔門有孔明及白帝祠因念東都興亡此其始
末其興也以公孫姦雄而不能撲中天之火其亡
也以孔明之英傑亦不能救中營之星二公成敗
不同而俱以廟食

安劉事固異危劉相去英雄二百秋火德方中徒僭帝
星營何隕遽亡侯草廬龍去存吳恨陞戟蛙狂遺漢羞
成敗不同俱廟食寧非霸業結偏州

連日過灘

一灘纔過一灘催雖若危哉亦壯哉白狗甫隨狼尾去
黃牛又逐虎頭來狂瀾逐淖幾成沸墜石穿江亂作堆
堪笑舟人詫春漲汴流難及順流回

昭君溪

巴峽向來惟屈姊漢宮奚事出明姬當時本有平戎術
中國難容絕世姿忍死定仇婁敬策惜生不遇武皇時
後人却恨毛延壽斷送春風入遠夷

益昌官舍簡兩仲

不管天涯與海濱
萬紅千紫一番新
樓頭鐘鼓三更雨
牆外鶯花二月春
風軟雁奴歸羽急
日遲鴛婦喚聲頻
青門載酒渾閑事
愁殺英雄老塞塵

初夏即事簡昞仲

夏雲方建漢旗赤
春事已如周轍東
幾度炎涼經嫩綠
一番榮辱委殘紅
杜鵑豈為歸心設
蝴蝶也無清夢通
萬里天涯喜強健
賸開窓牖納南風

利州登棧道

足跡初來劍北州
試登危棧瞰江流
萬山西接地窮處
一水東歸天盡頭
欲訪殺函無健馬
相忘楚漢付輕鷗
丈夫要了中原事
未分持竿老釣舟

侍親勞監遊雪峯

一水橫橋碧作彎
兩山排闥翠成環
寺居野色烟光外
春在人情物意間
點檢花梢香淺淺
摩娑苔刻字斑斑
門前車馬空來去
雲自無心鳥自還

丙戌春過梓潼即事

天公殊不問西東物意人情處處同
麥壘綠雛猶欠雨
花蹊紅穉不禁風
子規又喚天涯客
布穀還催田舍翁
欲挽遊絲網春住
歸鞍催我又匆匆

宿柳池松風亭

軋軋肩輿上劍門
春和身健快於奔
風翻紅雨摧芳信
山帶青烟入燒痕
領略物華無好句
破除旅思有清樽
高人喜與松風接
莫遣梨花到夢魂

丁亥沔陽春時即事簡吳叔永

朝來漸可試春衣
弩末輕寒力已微
木葉未繁山尚瘦
桃花欲落水初肥
疆陲敵逐征鴻去
庭館人隨社燕歸
紫陌青門無恙在
不妨携酒問芳菲

題漢中嶠冢觀高祖廟試劒石

手袖干將射斗牛
當時天意在興劉
不勞游及烹秦鹿
直以餘鋒剪楚猴
將相豈煩加越砥
寬仁自是淬吳鉤
斷蛇斷石都休問
遺恨平城雨雪羞

道間懷益昌總所海棠

點點紅粧綴綠枝睡猶未足已相宜
欠呼杜老供吟筆
僅約楊妃倒酒卮數日以來應爛漫
一風之後想離披
憑誰警戒司花女密遣輕陰謹護持

重陽登益昌錦屏山

徙倚闌干目送間山容如我亦蒼顏
恍思戲馬登吳會
擬逐飛鴻度漢關草木與俱嗟歲月
古今無恙只江山
天公幸自無風雨一笑黃花分也慳

和吳叔永見寄韻

眼空凡馬絕金牛肯念江萍萬里浮一倡朱絃補騷雅
片言華袞續春秋禮羅自昔須溫造文館而今欠薛收
要任丘墟百年責慎毋樽俎上南樓

詩懷今古浩無垠誰寄梅花隴首人芻豢悅心文字趣
筌蹄忘象性情真相望夜月袁宏渚一洗西風庾亮塵
我欲尊鱸便歸去雁來應問五湖春

送糟螯遺制幕

江鄉霜後飽珍肴萬里持來僅帶糟雖惜橫戈酣白蟻

尚知解甲護紅膏開樽祇覺牽歸興作賦猶當繼老饕
油幕晚寒梅影靜亟持大白薦雙螯

和夔門開濟堂韻

世事紛更局面棋滔滔逝水只東之幾堆頑石鬼神護
一節高風今古奇司馬豈能無戰壘卧龍祇合在籌帷
將星一落空遺恨費盡詩人幾許詩

宿新政縣登鮮于氏離堆拜顏魯公遺像公曾

赴蓬州作鮮于氏碑

屹屹金城唐砥柱如何流落向蓬州一時名節猶山重
千古忠魂與水流不待遺文垂紀錄自存生氣沮姦謀
當時誰挽浯溪水為洗離堆一段愁

至金泉登聚鶴樓

我住華亭慣識伊九皋僊去逐雲飛北山久為悲空帳
赤壁還曾夢羽衣姑和黄樓崔顥賦為邀華表令威歸
腰纏却笑揚州客應對金泉媿子微

登江陵沙市楚樓

徙倚闌干日未斜四圍不著一山遮浪花滾滾翻春雪
煙樹霏霏夾暮霞壯麗中居荆楚會風流元向蜀吳誇
樓頭恰稱元龍卧切勿輕嗤作酒家

簡項仲宗遊亭臯

試從沙渚入荆城十里金堤掌樣平曉露香留紅芰濕
午風清逐白蘋生柳邊繫馬頻酤酒沙際呼魚旋作羹
所欠直惟佳客耳明朝能輟暇偕行

宜城道間

蕭蕭風雨問南闌客裏單衣八月寒燈火數家樓逆旅
江山千里走卑官飄零岐路憑詩紀寂寞襟懷借酒寬
亟寫音書寄鄉國北山高卧儘平安

送清湘蔣尉

我學言詩詩不奇蔣君言命却能詩歲寒如許松不改
春信未來梅已知丘壑何如歸去好江湖終匪老來宜
辰州極去湘南近辦取柴桑三徑資

昔挿金蓮醉五泉與君抵掌共談天蜀山歷遍數千里

荆渚重逢八九年子為丹砂行作吏我無金鼎可求仙
更憐不是春風手雪意垂垂送去船

和闕幹雪中韻

夜來白鳳下天潢幻得人間玉樣光萬里園林變春景
幾家籬落失秋香黃紬歌枕水為骨紙帳吟梅鐵作腸
爭似城南老夫婦地爐相對擁蒲穰

再和

青女欺寒未肯霜先將銀鑠散祥光芙蓉曉院不禁老

簷蔔滿林惟欠香
冷入寶環銷翠羽
聲隨石鼎煮羊腸
兔園賦罷誰能繼
留得詩人祝歲穰

題荊門蒙泉

向來亭上醉流盃
千朵蓮花一樹梅
金炬依然霜不管
瓊琚猶待雪相催
凌波仙子欣無恙
姑射真人喚不來
風景則同懷抱異
倚欄欲去更徘徊

偕張總幹章帥機同游檀溪登極目和韻

底須風景歎新亭
且聽樽前賤子陳
拚却玉山頽綠醕

莫將銀海眩黃塵山容似畫屏環立世事如碁局幾新
惟有東風不今古露花烟柳一般春

美哉輪奐若天成一笑凭欄趁喜晴彈厭江山詩句老
破除胷臆酒樽盈溪頭圍圍觀魚躍柳外蕭蕭憶馬鳴
明日無妨再聯轡海棠猶未醉春醒

從制垣觀閱和韻

春風小試被廬蒐抵掌功名一戰收萬里闕河走狐兔
五更笳鼓肅貔貅星馳列騎看騰躍雲合嘉賓樂獻酬

機會不來人易老故都惆悵麥油油

同羅季能章成父張子直登樊城制勝樓

避愁聊復上層樓上到層樓轉更愁
杳杳青煙榆夾塞鱗鱗翠浪麥平疇
山連楚甸三千里地隔中原四百州
立盡欄干誰領會滄波渺處起沙鷗

送羅季能赴江陵幕

三首

淳熙公論盛槐門文獻依然故笏存
晉世昔聞期畢萬魯人今喜見臧孫
交遊半是清流望趨向難為俗子論

久客諸侯寧鬱鬱公卿元自出藩垣

留臺雄峙渚宮邊江漢中間別一天號令半皆歸後務
規模幾不減中權況從席上分鄒湛細向樓頭訪仲宣
為報荆人好相慶幙中無事帥垣賢

幕底從游數月間孤燈凍酒飽相懽平生得此於人寡
舉世如斯知已難舍我遽輕千里別祝君惟有一分寬
楊花正怯春歸去忍向南關送客看

以勸分出伏龍因謁武侯廟

廬存龍去跡成非草木空山聖得知成敗論人陳壽史
功名餘恨少陵詩初心何只三分漢偉略徒誇十倍丕
半夜松聲捲風雨猶如抱膝嘯吟詩

和劉清叔檀溪韻

一溪清入漢江東千載興亡指顧中自昔霸圖成匹馬
至今生氣貫長虹當時枉駕先諸葛底事浮江後阿童
髀肉已生騅逝矣空餘欸段踏塵紅

壬辰過鄂渚簡張子直總幹二首

一自檀溪把酒餘年來夷路浸崎嶇樓頭落日人空老
局面西風事頓殊故國山容增黯淡舊時柳色半荒蕪
草堂想見憂時切曾賦官軍近捷無

三載三來漢水湄做成底事又空歸塵埃暫解微官縛
雨雪猶存戰士衣黃鶴喜尋詩侶約白鷗還悟海翁機
掀髯一接春風笑便覓漁叢老釣磯

甲午淮幕和蕭應父贈鄭允蹈韻

休從太上問靈均華髮駸駸及此辰萬里斗槎難遠問

一時星弁玷同寅縱逢裨竈言何益自斷虞翻相已屯
且喜歲星臨宋分今年頡利定稱臣

客來遠自洞庭濱一笑相逢耳競傾把酒未須論後約
讀書已恨欠前生疇堪太乙青藜照亦有豐城寶劍精
近在眼前休錯却君如未識問君平

和蕭應父贈黃子芸韻

久負詩壇第一評肯教棲鳳久榛荆西堂有夢堪追謝
北海何書可薦衡匹馬歸來嗟我俗孤鴻吟對羨君清

霜前蠨蛸嫩新筠美為問江頭潮已生

和蔣志父春風亭韻

漕幕蔣志父登春風亭有春風亭上問秋風之句
一聯云每恨從來欠機會却憐今代少英雄因和
韻以廣之

不須舉扇障西風且付黃花一笑中漸喜盧饒成兩斃
仍愁蜂蟻起羣雄未能長策輒從北果有真儒輒豈東
老我數奇何所用快教兒輩學從戎

再和

誰能草檄愈頭風有酒時時共一中莫把丹青羨蘓武
且將玄白玩揚雄將軍事在龍荒北客子心馳馬首東
休笑晉朝人物少猶知口不道和戎

次蔣志父韻

漕幕蔣志父以予潁上之行有贈云能張吾軍從
古少差強人意似君無不足以當此然不可不和
中原百戰後來蘓浸喜衣冠復舊區要得一行須老將

曾何千慮付狂夫山川感慨詩難盡烟火蕭條酒尚無
若問西湖已蕪沒望窮惟有幾浮圖

甲午七夕在京和朱子木韻

巫雲一去付悠悠堪笑星河老不休天上淒涼兩魂夢
人間閱歷幾春秋銷磨長恨詩難盡領略良宵酒莫留
借我天槎試相問拙人還與巧同不

甲午中秋在魏塘值風雨

向來翫事每欣逢老去相忘更客中天下山河清影在

人間風雨此宵同。孤鸞夜泣。菱花暗老。兔杵悲桂子空。
料得嫦娥念搖落。不教無酒對征篷。

乙未渡淮點軍登壽春南樓

曾向春秋識此州。西風吹袂過淮頭。人還故老衣冠喜。
我為中原草木愁。屹若長城今重鎮。棄如敝屣昔輕謀。
功名不是吾曹事。且對空山徙倚樓。

己亥題茅山玉晨觀

煙雲作嶂松作闕。夜深迫人星斗寒。分明已在天上坐。

不可更作人間看須臾睡去復睡覺髣髴前身在巖壑
洞門鎖鑰呼未應時有花香暗飄落

庚子祈雨蔣山贈月老

蔣山月老嘗謂予言寺贍衲子數百闕半歲糧予
曰何所辦之曰賴寶公打供耳予曰爾之住蔣山
我之總西餉也道不同而理同恃此心而已矣宿
因禱雨醒出舊話綴作一詩以寄庚子秋晚

欲知計寺金穀吏便是鍾山粥飯頭爾欲朝朝動魚鼓

我期日日飽貔貅幾為曉竈炊煙喜又作秋田渴雨憂
自有寶公能辦供元憑心上細推求

送趙鼎臣赴召 二首

幾載江湖負雋聲秋風千里起弓旌石渠喜得今劉向
宣室應知舊賈生臺閣致身將貴顯朝廷論事且和平
更須記取中公語不在多言在力行

師旅之餘旱繼之可為太息此何時江頭人類魚鱗集
局面憂深虎口危國事不應分爾汝邊防豈特固藩籬

茂弘若問金陵事說與江東米價知

和別制垣金陵勸駕韻

殷勤儒帥餞圖南文物彬彬歲比三遠業相期唐進士
流風一洗晉清談歌陳叻鹿筵初宴分揣庸駕乘莫驂
好向瓊林待公袞杏園春色正紅酣

贈聞人松菴

官術猶能手不龜予之為術亦如之價增三倍玉麟顧
言訂千金木石詩鷗鷺尋盟吾自計鷗鷺付分爾何為

異時蓬華來相驗直說太平卿相誰



可齋雜藁卷二十八

欽定四庫全書

集部

可齋雜藁卷

二十九至
三十一

詳校官庶吉士臣吳烜

主事臣呂雲棟覆勘

總校官庶吉士臣倉聖脉

校對官原任典簿臣郭祚熾

謄錄監生臣連彭年

欽定四庫全書

可齋雜藁卷二十九

宋 李曾伯 撰

七言律詩

辛丑都司公廨與陳景清諸友小集作

幾年漫浪尚萍流
泊沒京塵雪滿頭
得意正濃須却顧
奉身而退是良謀
未忘雅志懷安石
長憶平生愧少游
歸去何求閑足矣
數椽村屋一虛舟

再和

當才誰可柱中流我輩何如避一頭舊隱要尋鷗作伴
薄田足與鶴為謀蒹葭白露嗟今老榆柳西風感昔遊
新林已登鱸蟹賤溪頭何日艤歸舟

送郭靖父還金陵二首

慈恩得雋綠衣歸幾客南來罕似之名氏已標希呂第
文華要繼幼安詩行登衮衮諸公上母鄙區區一尉卑
踏雪同來子先去夢隨鞭影過江湄

憶昨相從戎馬間屢披錦誥慰蒼顏烟塵歷徧疆陲後

風雪同諳道路艱子負此名心已白我成何事鬢徒斑
一杯握手無它祝歸為移文問北山

贈林相士

亦能
談命

賣卜長安作漫游裹糧千里為親謀時危貴得班超相
命薄那能李廣侯術挾瑟竽雖易售話逢柄鑿亦難投
江頭雨滑東風急挑却行包歸去休

維揚再贈林相士用前韻

林相士三年前金陵相訪嘗以挑却行包之句送

之重來維揚要亦無可言者聊為拈出舊公案以遺之

三數年來已倦遊祇緣心迹不相謀深知我類虞翻相
莫怪人驚雍齒侯江國舊懷詩一解吳鄉新思酒雙投
一番公案重拈出挑却行包歸去休

癸卯制參黎用之為八仙領客和韻

撲面驚埃掃不開都忘柳色暗章臺偏饒玳席嘉賓樂
特遣瑤池仙子來自分鐵心徒自苦相逢玉兔莫相陪

樽前休訝清香少待約瓊花共一杯

夜分和鄭小山韻二首

弓劍相隨幾歷年鬢毛斑剝飽風烟可憐蘆葉胡茄地
又過菊花新酒天耳聽驂騑還紫邏夢隨白鷺過青田
家僮久問謀歸未想笑吾頑不可鐫

塞上蕭蕭雨更風秋來興味與誰同短檠聊和燈前句
長檠休誇馬上功挽二石弓陪一校操方寸管較諸公
到頭等是為形役盡付掀髯一笑中

贈相士陳林過金陵

疲於吏事老於兵不特頭方命亦屯成敗固非予逆睹
窮通何用子前陳登朝不是鳶肩相守塞尤慙燕頷人
見說江東多福德亟須洗眼望堂麟

甲辰送淮東黎漕趙朝二首

簾捲紅樓拍手看星軺迅步上鵷鸞皇華節下留佳政
玉筍班中作好官卿相致身時則易忠賢得路古來難
端門待漏東風峭尚憶屯邊鐵甲寒

始焉來此學分弓定計初筵畫諾中擊楫少能思祖逖
同舟多賴有婁公老懷不奈周南滯佳客今成冀北空
天上故人如見問為言憔悴已成翁

送胡季輒制參赴堂召

怪得簷頭鵲語頻好音催召幕中賓喚回雞塞三更夢
趣取鶯花二月春車法陣圖留後效囊封諫草看前陳
退朝若訪孤山去尚有疎梅可寄人

君見淮頭尚可為勿言蚌鷸正相持再三國計當加備

第一人材最切時面目山林還爾我精神帷幄舍渠誰
登樓若也披輿地為借前籌試及之

傅山父携示曾玉堂和余韻答之

誰傳新語到邊州來自鑾坡最緊頭句法自成臺閣樣
交盟猶為友朋謀憶征西府勞清夢望上東門想賁游
何似天風輕借助放教歸老釣魚舟

右司周昞仲亦用韻併和以謝之

誰將拙句徹名流勾引春風入筆頭廊廟喜登端士用

田園盡為故人謀，曾芳草外思淮事。
應海棠邊念蜀游，細雨挑燈成朗誦。
劇談如共峽江舟。

送制機豐德馨赴堂召

二首

元祐豐家幾世孫，依然風概至今存。
著鞭自許河南遜，舉酒相期洛北溫。
聯句有詩留月觀，禦戎何策告天閭。
切毋飲却西湖水，齒頰冰霜置勿論。

奇章昔送牧之行，舊事今親見廣陵。
一叟栖栖嗟了立，諸賢衮衮慶偕升。
事來推與參前著，公去吾其失右肱。

我俟兵休歸決矣斷無清夢到觚稜

壽城圍解制參向君王貺以凱歌和韻二首

誰知七節落轟雷三月新城兩月圍
吉語雖傳淮鶴捷驚心幾動海鷗機
公毋誇伐稱全壁我為憂疑已佩韋
何處無魚堪薦飯不須跼跼看鳶飛

中流岌岌此舟同對越皇天只寸衷
今夜千艘趨險進明朝萬馬舉羣空
將軍爭上平戎捷老子慙無守塞功
局面莫貪邊用利共思穩著待西風

久雨之餘隔窓聞雪簡書院諸丈

二首

雨覆雲翻越月餘苦疑滕六欠工夫
倏敲窓竹清成玉
細剪簷花碎作珠
已喜新冬三白有不愁嗣歲二紅無
地爐紙帳盃行了呼起詩翁為撚鬚

玉龍飛下太清境粉雉凝成不夜城
眩得窮兒猶暴富
照教暗室亦強明
來朝細挹千林色竟夕都忘萬籟聲
不願銜枚蔡州去
鐵衣早撤戍邊兵

乙巳題制參蕭應父龍襄芳亭

細攬羣英入此亭重開八葉付公門無窮真意侵書架
不斷清香對酒樽由實又花花又實看孫生子子生孫
主人不用平泉誓自有根源六藝存

送翟簡卿制參赴南安

二首

渡江華閬尚瓊青人物林中蚤有聲官轍久更諳世路
邊籌孰試洞戎情整鑣向闕人多羨出幕持麾古所榮
盍為王言留禁闥美才何止僅專城

自屈星屏佐碧油艱危同濟此風舟平山楊柳留住話

庾嶺梅花想勝遊
公到玉堦宜抗論
我尋畫舸便歸休
他時若訪無真里
野水中間一白鷗

送周昞仲大卿歸江西

中外周旋閱幾年
清忠一節可箋天
歷階而上公卿易
拂袖以歸韋布然
雪上人稠難買屋
江頭路穩好行船
夢回落月應相憶
猶有征人在漢邊

和傅山父喜雨韻

二首

驕陽赫赫正當空
化作甘霖覆手中
洗滌四郊無點翳

作興羣槁有新功，惟方寸地能精格。信咫尺天隨感通，
毋以喜書安僅足。更行好事答高穹。

柔金老火苦相鏖，千里駸駸地不毛。忽遂所祈欣欲舞，
舉蒙其利潤於膏。昭蘓田畯禾千頃，飽滿舟人水一篙。
我老發揮無好句，須拈健筆付詩豪。

和幕府稅巽父弔陳任二諫議韻

出門三十里，平原仰止高山禮。甚專烈日秋霜，千祀後
寒煙荒草兩塋前。一瞻文獻生何晚，三嘆姦邪死不先。

臣也不忠宜共戒然嘗何惜更加遽

東西正陽獻捷和傅山父凱歌韻

一從授鉞俾來旬却敵無謀效不神
士用命焉何有力臣今老矣不如人
誰能河北平三晉猶慮關中啟一秦
留取功名待來者歸歟抗疏告嚴宸

食河豚鱸魚席間口占

午食河豚晚食鱸兩魚風味絕懸殊
懷歸未必因茲品適口何能計此軀
春岸荻芽常喜看秋風蓴菜不愁無

笑他俗子甘鯁鱔為此杯羹戒不虞

丙午九日將過陽羨偶成

年年秋晚對風沙今近重陽喜在家自斷此生甘皓首
能消幾度看黃花閑身頗覺便筇竹醉態都忘脫帽紗
且問小舟溪上去飛鷗數點夕陽斜

遊張公祠 二首

坤靈闡迹漢何時木石深山聖得知大塊鑿開真境祕
太虛蘊出衆峯奇攀蘿攬秀俯可即秉燭窮幽遠莫窺

盍遣神龍謹封護勿容俗子亦游嬉

十年重過石橋行松下清流載濯纓洞隔烟霞知地遠
壇連仙佛信天成人如雲意俱閑適山帶霜容似瘦生
步出亭皋便歸去它時林壑又寒盟

山中即事

手按巖菊嗅寒香陡覺輕飈透薄裳自是蒼官添老色
不因青女眩寒粧新籩未熟啜茶去晚稻才收種麥忙
願學老農惟苦懶荷鋤歸去卧斜陽

送八窓叔歸

歸來百事付休休又向空山斷送秋
整疊衣篝雙赤腳
攜持拄杖一蒼頭
儒書梵語相參看
酒柱詩盟自獻酬
客有可人留不住
夜長誰與話清愁

丙午冬徐行道見訪於可齋

甫能鋤月種梅歸竹外
欣聞客扣扉
天近城南寧去緩
人閑水北肯來稀
風雲迅步新班筍
雨雪休思舊戍薇
別後毋墮問名氏
杜門終老但知非

尤木石薦術士松庵求書以詩送之

衝寒得得過吾門切莫談天不願聞
種木十年甘自許寄梅千里欲何云
誰相記懷明月我已無心等片雲
若向霸陵逢醉尉不須與說故將軍

丁未效八憲叔賦黃郎

夙悟金僊空色教化生千百對青春
強顏翁媪樞為貌取悅兒童絲繫身
立仗無言開口甚當筵何事掉頭頻
笑他鮑郭經年舞我過鶯花即問津

因賦風箏與黃郎偶

竹君為骨楮君身學得飛鳶羽樣輕出手能施千丈縷
舉頭可問九霄程高窮寥曠寧無力少假扶搖即有聲
所惜崢嶸能幾日兒曹樓指已清明

送焦吏部造朝二首

向來借箸在籌帷今趣魁纒入太微漢郡奚勞汲生守
洛人喜見范公歸要持真是明公論莫急同心濟事機
見說九重勤側席細陳長策慰宵衣

火雲赫赫汗衣流人望公來望有秋契托棣華承繾綣
辭陳桑土願綢繆行為霖雨千疇足坐解西風一段憂
從此江頭波浪息柳邊贏得伴沙鷗

偶得希直巖壑舊隱正在小圃因賦

數峰佳致藹前修心匠玲瓏小更幽公去我來幾傳舍
人非物是一虛舟蠹天柳色新條改垂地藤陰舊迹留
坐對黃花誰領會猶疑蝴蝶是莊周

又賦

高人已逐烟霞去此地猶餘巖壑存
十數小峰纏古蔓兩三老木長盤根
月沉翠柳空梁影雨洗蒼苔帶履痕
留得清風師後進絕勝金谷憶王孫

八憲叔用前韻相寄時留村舍和以謝之

從渠舊隱擅清修我愛吾廬溪上幽
一幅霜林長短樹幾灣烟葦去來舟
買魚釀秫作新節招鶴訪梅遲小留
却憶故山懷故老寧忘癡緯念宗周

洛川已矣不復見斯地巋然猶獨存
九仞成功忍虧竇

百年種德在深根依稀舊燕空梁語俯仰飛鴻踏雪痕
多少名園富花石爭如書圃付兒孫

又和八憲叔見寄

寂寞寒枝問故棲柳疎梧老影熹微炊烟冷落犁荒墾
蓬雨廉纖纜斷磯擬閱舊書成懶癖旋竊新酒解愁圍
家人不慣田園趣剛道天寒盍早歸

戊申春偶成

半世崎嶇鬢已凋元知官職忌之招幾番惡夢覺已晚

一片好心磨不消枕上豈堪思往日樽前更莫計明朝
此身若也填溝壑猶有來生答聖朝

賦家山夕秀

本因累土作層臺巧匠俄為小阜堆碧落界邊將塔對
蒼蘊斷處送山來狀成一段林巒勝欠得幾株松桂栽
夕照未沉明月上倚闌正爾可徘徊

又和

小亭八尺石為臺占綠園中作翠堆一片閑雲難畫去

四時野色入詩來，氣凌月觀身曾到。
夢托雲根手自栽，更出城樓一頭地。
夕陰含雨肯低徊。

和褚縣丞韻二首

世味寧如道味濃，誰令小屋卧元龍。
何當談笑與雙壁，乃假吟哦對二松。
傾蓋正欣留馮李，歸檣底事取潘封。
先生且辦弦歌計，莫慮瓶無斗粟春。

拍拍新書一紙春，相逢牢落易相親。
霸陵李廣方嗟老，闕里原思乃嘆貧。
顧我棲遲甘一壑，感君慰藉重千鈞。

燈前欲和梅花引病髮飈飈滿面塵

已酉慶周子將壽八十

華齡八袞慶朋簪貴老崇師喜見今絳帳先生從白髮
金閨諸彥盡青衿冰寒水見源流盛玉在山知潤澤深
厚德作人宜壽艾永傳文獻紀紛陰

和褚縣丞韻

哦松之去爭能誦載月而歸取甚廉誨掖尚無忘後進
典刑真不愧前瞻新詩慰藉知三復雅意勤渠示一謙

願問閨中讀書味魚熊何以得而兼

已酉赴桂過撫州樟原得雨

夜來一雨洗驕陽
軋軋藍輿趁曉涼
過眼幾多山應接
轉頭二十里相望
烟橫夾道松交翠
水拍連疇稻半黃
轍迹平生今始到
元知樂土是江鄉

憶幼子

膝下相隨五閱秋
意其可以付箕裘
祗緣老子身無福
致使佳兒命不修
宿業結來知有自
暑行壞會復奚尤

靈臺一點知何處痛入肝腸死則休

題衡山縣驛

平生足始涉南方邸舍稀踈驛路長尚隔三州纔嶺嶠
更行幾日是瀟湘家人轉苦禁秋熱輿從常催趁曉涼
識破浮生等羈旅強加餐飯莫悲傷

和鄧巽坡韻

身雖湖海常懷主忠在朝廷肯具臣為國未嘗知有已
此心何以質諸神綢繆舊話方樽酒拂滌征塗滿袂塵

雍齒且封君豈慮正須珍重保千鈞

題衡陽臨湘驛

暑塗挈挈問持裝過眼顛風倏轉商豈為南魚來丙穴
且先北雁過衡陽童烏已矣腸空斷老馬疲哉汗欲僵
身大塊中猶大瘡鐵心禁得幾炎涼

過愚溪

為底先生此水居正緣不解學顏愚身雖樂彼溪山似
名不期而天壤俱往事勿言今已矣當時豈意在茲乎

擬招故老窮佳勝烟草蕭蕭宅一區

過清湘洮陽驛和方孚若韻

問驛尋梅路漸深壁間誰帖邁來禽困詩感嘆人才舊
投筆慙書歲月今訪古暫陪湘水滸憂時遠到雪山陰
牧羝持節疇能似空倩賓鴻為寄音

禮湘山佛和別駕叔韻

自得湘南一派奇禪春元熟不須師幾千億化如來相
五百年將再出時翠壁雲連秋樹老寶坊香靜午齋遲

我來欲和因緣事衆衲叢中有解知

可齋雜藁卷二十九

欽定四庫全書

可齋雜藁卷三十

宋 李曾伯 撰

七言律詩

送交代董矩堂赴召

三首

淵源正學富經綸
炳炳如丹一片心
中外久期還荷橐
江湖所至是棠陰
威聲足使戎心懾
邊腹何虞客氣侵
指日玉階清問及
盍思長策濟當今

渡瀘已定葛巾北
分陝既成周袞東
二者於斯皆上意

羣然以此望明公香名千載梅邊雪歸路三秋桂子風
百萬民夷休戀戀公方柄用福無窮

朔風繡節洞庭濱作噩重逢未識真不謂顏齡來嶺海
乃承華武接星辰公捐纍印輕於葉我愧滿襟皆是塵
從此廟堂醫國去好留肘後遺陳人

和鄧巽坡詠菊併見寄韻 二首

天涯秋晚見孤芳華髮蕭騷易感傷對酒未嘗忘北海
因詩惟恐瘦東陽古心翻得風霜白冷艷寧隨草木黃

惟屈可餐陶可採蝶蜂爭得識寒香

轉蓬又是幾三秋客裏常宜視昂羞嶺首舍梅無所有
衡陽斷雁寄何由淒涼陳迹幾年事繾綣高情一夕留
聖代斷無車蓋禁詩筒毋惜到南州

登逍遙樓和方孚若韻

堯山舉目見於牆羣玉森森拱巨梁一幅畫屏羅偉觀
兩詩銀筆冠當場沙平鷺立秋無盡月冷烏啼夜未央
有客凭闌共清話逍遙何異白雲鄉

登湘南樓和方孚若韻

天教管領衆山來，筍立平章翠作堆。
上馬休憐翁矍鑠，酌壘聊賦彼崔嵬。
樓高蒼桂竒觀列，人對黃花逸興催。
公退呼兒同徙倚，卷舒風月等浮埃。

登西樓題柱

分弓來戍嶺南州，勲鏡塵生雪滿頭。
願進愚言宜簡易，頗哀老子得遨遊。
青山落處鐘聞寺，白鷺明邊人倚樓。
衙散吏歸冰樣靜，一庭落葉和晴鳩。

已酉八桂勸駕

快束行裝穩著鞭
梅邊已報小春天
程開鵬翼三千里
名繼龍頭二百年
花插一枝趨燕喜
雲占五色對臚傳
丈夫自許當如此
舉酒相期共勉旃

庚戌題雪觀用方孚若韻

纔見春從沙際歸
堂堂背我迅於飛
病餘窺圃心成怯
老去登樓力苦微
岸柳含烟猶綠瘦
海棠裛雨正紅肥
山川信美非吾土
強作清吟祇遂非

和鄧巽坡見寄元夕韻

一笑芳宵萬慮平詩翁猶自假詩鳴
名邦想見燈成市病骨相忘月暗城
人事誰能記今昨天公都莫管陰晴
窓前細讀梅花句但覺身輕眼倍明

又和梅韻

千里詩來字字香品題著意到孤芳
以千林表丈人行洗萬古凡兒女粧
自是精神凌雪月不妨風骨飽冰霜
撚髭聊以酬清思病筆欹斜媿小王

寧壽寺幼農登慈氏閣和李誠之柱間韻

持酒殷勤問爾農憂時同此願年豐倉箱欲致崇墉積
耒耜宜加曠土功水北有田均夜雨嶺南無地不春風
吾皇德化形扶杖親見兒嬉七十翁

瓊筦顧守示和愚溪詩用韻餞之

鯨浪中間一島居往時千慮笑狂愚伏波方畧今堪擬
渤海聲名斷與俱小醜當從而靡矣吾民其庶有瘳乎
雙旌整頓雙泉了歸佐清朝澤廣區

題越觀和方孚若韻

簷陰寂寂轉西遲
檢點春工倍費詩
烟樹鬱蒼何處洞
雨苔斑駁舊人碑
清泉白石仙遊地
芳草綠陰晴晝時
目送水雲誰領會
沙鷗點點柳絲絲

禁烟日登嵯峨閣和方孚若韻

漠漠風煙著野棠
一春多恨雨浪浪
古榕陰裏作寒食
芳草城頭過艷陽
不斷山光通百粵
無邊春思渺三湘
伊祁不放花飛盡
露濕薔薇幾陣香

庚戌赴荆間舟過湘江

湘流得雨掌來平
艇子乘風羽樣輕
過眼千山纔嶺粵
轉頭一水又衡荆
大江東下懷鄉國
落日西邊是戍城
鳴鳩數聲青嶂晚
客心如鐵也關情

和總幕劉景文題杜立齋遺翰詩韻

一老風流兩社間
至今膏馥尚留殘
典刑已矣墨猶潤
生死以之盟未寒
淮海屬心知士苦
山林投分只儒酸
燈前掩袂空三歎
盍與傳諸琬琰看

辛亥元夕坐間和劉景文韻

客心似向漢槎來便盍觀光近斗台王儉池邊新節物
劉郎觀裏舊根栽饒人老月添春好特地癡雲際晚開
明歲傳柑天上宴馬頭猶記渚宮回

又和

多謝嬌娥得得來肯陪綠鬢映黃台剪成絳蠟燈間艷
移向青油幕底栽萬目競拚通夕看兩眉贏得片時開
祗憐人亦牽絲戲任向當場弄幾回

書院諸客登仲宣樓以詩寄之

指點層雲氣可干官身浩嘆不如閑幾回落日詩懷古
一半春風酒破慳許我婆婆從白髮於人嫵媚有青山
前身王粲重拈筆惜欠胡床著席間

送書記雷宜叔造朝

五色雲邊昔稚圭軍戎萬里已周知趨朝豈止重憑廣
出幕聊為送適詩行李羽輕清漲穩交情珍重歲寒期
君王若問荊州事白玉階前細數之

曾總幹以乃尊侍郎二詩見示和韻

別公知閱幾桑陰玉筍山中舊隱尋
邸暮聯鑣來自舊涇舟共楫繼由今
一門翁季芝蘭味四海弟兄金石心
塞上西風漸蕭瑟書來毋惜寄規箴

疇昔風雲共壯游笑吳夏口蜀江油
我猶乘險凜孤注君早得閑先幾籌
眼底阿蒙元齷齪膝間文度儘風流
箇中妙理誰能會且向平原喚督郵

陳次賈歸以二詩言別和韻送之

百尺樓前艤去梳元龍豪氣肯低徊昔從桂嶺訪梅去
今自荆江載月回敢擬王劉曾主客應嗤瑜遜等輿臺
轉頭落日陽關外三歎可人呼不來

手袖朱絃綠綺琴身雖湖海調山林家園千里歸心切
朋友中年別恨深國事艱難殫我力世情巧拙聽渠任
海門雁過應相憶塞上征人正苦心

壽利州趙漕

天稟銀河一派清藹然中外播休聲金城方畧今充國

斜谷規模舊孔明屈久轡絲勤使指再須班
筭著宗英九重側席親賢切有詔西南起老成

幾載星軺惠漢關埴培壽脈一分寬數絲鶴
鬢因民白一片鷗心為國丹綠野高風雖獨
慕黃花晚節正爭看勲名麟閣清芬在且伴
松椿傲歲寒

壽遂寧李漕

今世儒宗一泰山暫乘紫氣下函關主盟道
學周程上伯仲詩名李杜間少府暫分膚使
節甘泉合在侍臣班

春江一碧平於掌好趣牙檣待賜環

自從岳牧著民庸十載岷峨帝眷隆
草帶雨鋤周圍綠栗和煙輓漢闌
紅活人陰德深無盡壽國良方用不窮
一轉鈞間黃閣去天涯歲歲囿東風

自是清都紫府仙德星纏次劍東川
香浮世界鶯花地人樂春風燕麥天
元祐賢材名閣近紹興相業慶基綿
一年一佛為公壽五百尊成五百年

壽蜀帥

天遣長庚衍硃瓜幾年清廟著聲華九重璿派周麟趾
千里金城漢犬牙未駕說舟儀列鷺已麾段笏擊長蛇
堂堂一節鼎鐺耳豈借西山太史家

霄漢當年把繡衣載持齋鉞建侯珪春城月淡銅梁北
夜柝星沉玉壘西外閫規模蕭葛上中朝勲望范韓齊
楓宸側席親賢久早晚鳴珂步相堤

不用江山當壽卮年年一佛住峨眉崧高復見歌申伯
垌野寧無頌魯僖歲比絳人逾甲子日逢皇覽揆庚寅

書生愧乏梅花賦引領東風上北枝

壽應茶馬

自聯班序簡宸聰廊廟江湖一節同百世幾人今蜀日
千年一到昔虞風得莘渭上康時策有伊洛間傳道功
早晚為霖洗炎熱蒼生俱出炭爐中

太微一宿燭魚鳧已奏平反課轉輸綠碾雨前舒鳳爪
青鎌雪外長龍顧班崇東壁圖書府惠暢西夷道德塗
佇佐修壤歌六月載銘石鼓會東都

漢昂殷箕謾擬倫天將平治啟儒真鍾英寶婺金華地
歛福銅梁玉壘民冰壑雪山無點暑桃溪棠蔭有餘春
綿綿壽脈無窮處一派根源在至仁

壽陳制垣

十載青油駐漢闕勛名高壓峴南山雨滋萬頃春犁樂
月淡三邊夜柝閑為小朝廷留宿望升真學士重崇班
九重銀信知非遠白玉階前一武間

向來荆楚說邊州人士今誇樂國游千里潢池自交擾

一江漢水獨安流，兵無敢情身為率。民有猶饑，惠亟賙。
陰德活人無量大，不須香火祝王侯。

東皇粧就牡丹天，來獻蓬萊不老仙。耆舊喜增羊祜傳，
蠻夷欣問晉公年。休懷茗水清風適，且醉檀溪綠草邊。
願向衣冠圖上看，銀屏千歲映貂蟬。

代為其親壽

十載青油駐峴山，屹如一柱倚人寰。秧疇雨足春犁樂，
榆塞風清夜柝閑。威望龍堆羶帳外，勲名麟閣鼎彝間。

命圭指日催裴度樂府無煩唱玉關

兩星相比映文昌戲綵蹁躑戟衛香鬢底公因民事白
眉邊人卜詔書黃五千文字為家計百萬陰功即壽鄉
要學元和同九老未誇耆舊傳襄陽

壽岳漕

渡江人物照乾坤盟府勲庸奕葉存崧岳千年申伯雅
漢臺幾世仲華孫自將翠節臨南紀更佐金城護北門
禁柳官梅正春色好看鳴玉上天閭

檀溪翠霧曉輪囷共慶皇華誕玉辰
樓指明宵三五夜
從頭新歲八千春
且煩皎月清邊徼
行逐東風造禁宸
留取棠陰蔽南峴
為陪羊杜壽蒼珉

江陵和費察推九藥瑞蓮韻

喜對荆人一笑媽
吾邦今見此嘉蓮
脂容嫵媚目疑幻
玉貌參差骨是仙
試把萬葩千卉較
曾無一蒂九芳連
分明河洛中興象
要竭精忠答上天

壬子夏偶成

心已灰如鬢已皤迫人桑蔭疾於梭更嘗萬事不為少
恍悟一身猶是多田里乞身斯可矣功名到手竟如何
公餘幸喜邊烽靜且對樽前浩浩歌

壬子江陵寄聞人松庵

不見松庵又幾年書來云欲卜新椽我方北塞愁供成
君盍西湖喜結緣多謝烹魚勤客遺薄言騎鶴寓腰纏
惜無廣廈歡顏力姑用長安作酒錢

秋霖喜霽適覩廟堂酬唱相去數千里而陰晴

同之因用韻

明良相正體坤乾感格時賜本致虔坐使羣方皆見日
誰言千里不同天只將精白承休德豈在緇黃結善緣
更得北風無羽檄不妨舉酒樂康年

可齋雜藁卷三十

欽定四庫全書

可齋雜藁卷三十一

宋 李曾伯 撰

詞

水龍吟

甲申潼川翫月

西風吹上牛頭天涯慰此人情耳斜陽任晚青山全似
故人知己迤邐歸來須臾懶去桂華猶未待冰輪推上
梧桐樹了更兒是點兒幾滿眼碧天如洗便分明水晶
宮裏區區翫事一觴一詠一燈而已欲待無眠爭如

且慙有無窮意怕嫦娥隔窓偷看須下却帳兒睡

又

甲午壽
尤制使

幾年野渡孤舟蕭然袖此經綸手歸來廊廟從容進退
祖風猶有小隊環花輕艘漕玉暫臨金斗把詩書帷幄
期年坐嘯塵不動依依柳好是公堂稱壽正元戎閭
垣開後旌旗纔舉胡雛馬上聞西風走一點陽春無邊
德澤淮山長久待官軍定了長安貂蟬侍未央酒

又

己亥壽
史督相

明堂一柱擎天眼看黃閣空諸老平生方寸班班四字
誠心公道玉帳雲旗金城露布尚勤征討向淮頭蜀口
一時做就安石傳孔明表談笑妖氛如掃看整齊乾
坤都了衮衣赤舄歸來廊廟雍容師保三相一門雙親
千歲人間蓬島舉黃封細唱調羹官梅上正春早

又

庚子壽
史丞相

東南一氣當春便從黃鉞登台斗紫皇舉此亨屯濟泰
屬之公手淮浦烽銷朱央觴獻捷傳清晝慶太平朝野

駸駸重見昔淳化今嘉祐 史觀年編新就看勲庸光
前垂後三槐鼎盛雙椿盤固古今希有宴侍龍顏驩承
鶴髮相期長久問前朝相業誰同八九十邁文富

文潞公九

十富鄭公八十

又

壽游參政

岷峨壽佛東來手移斗柄春寰宇經綸事業詩書流出
時為膏雨載來三階炳丹一念雍容樞輔望巖廊風範
揚休山立真漢相殆天與 國步時當如許賴明堂倚

空一柱蒼生引領整齊中
夏奠安西土多士相期直須
無愧范韓文富且梅邊一笑
春風祝公壽介東魯

又

丁未約諸叔父翫月期
而不至時適有臺論

舉杯長揖常娥高情怜我
霜髯白婆娑樹底老蟾何物
千秋一色一鏡高懸肺肝洞
燭了無塵隔任億千萬里
同然玉界都不管天南北
老子萍蓬蹤跡對西風幾
番行役平生翫事從頭細數
山川歷歷明月明年知他
何處能如今夕惜無人共我
登樓酌古一笑橫笛

又和韻

少年管領長宵直須醉待東方白而今老去何憂何樂
不空不色桐影橫斜桂香搖落仙凡奚隔恨銀橋夢斷
玉簫聲杳人如在楚天北冷眼乾坤陳迹笑英雄等
為形役庾樓袁舫浩歌長嘯壯游曾歷萬里瑤臺乘風
歸去不知何夕對冰輪孤負欠千鍾酒與三弄笛

又和韻

歸來袖手江湖不妨左右持螯白涼宵幸對一輪端正

娟娟秋色萬宇冰清千林霜縞更無雲隔對金莖露冷
銅壺漏靜梧陰轉畫橋北堪嘆平生轍迹算紛紛為
誰驅役兔蟾應笑蠅蝸累我中年虛歷抖擻吟情徘徊
舞影可怜佳夕悵力微心在夢中一曲似黃樓笛

又
戊申壽
八窓叔

歸來三見梅花年年借此花為壽八窓軒檻月邊竹畔
數枝開又姑射肌膚廣平風度對人依舊把離騷讀遍
椒蘭荃蕙奚敢及衆芳首幸與歲寒為友任天公雪

偃霜倦香名一點西湖東閣逕逋曾有金鼎家瓊玉堂
椽筆倘來斯受且巡簷管領先春林外事付卮酒

又已酉壽廣
西豐憲

幾番南極星邊樽前常借南枝壽今年好處水清漢節
與梅為友老櫓蒼榕婆娑環拱影橫香瘦把草庭生意
蠻烟盡洗都付與風霜手嶺首小春時候看明宵桂
輪圓又此人此地此花此月宜詩宜酒把綉歸來調羹
金鼎西湖春後願玉奴歲與素娥不老共人長久

又和豐憲題林
路鈴梅軸韻

小牕香霧籠葱硯寒金井頻呵凍老坡仙去新聲猶寄
綠毛么鳳瘦臉盈盈不禁僂僂雪濃霜重賴墨池佳致
草成玄白聊以此當清供長記月明曾共撚虬髯幾
番孤聳春風一點著公翠袖撩人清夢逋爾何如西湖
慣見影斜蕖動要歲寒得友豈容無竹倩誰添種

又
辛亥和吳制
參賦雪韻

玉龍飛下殘鱗千巖萬壑皆填委乾坤一色不知身隔

蓬萊幾里疑是瑤英盛開園圃被風敲碎倚危樓極目
長江渺處渾錯認沙鷗起 依約青帘遙指記山家酒
香無比訪梅江路何時歸喚小蒼長耳孫案袁門不妨
高卧足娛書史且摩挲霜鬢嘲吟冰筋共荆人喜

又 席間諸公
有賦再和

琅琅環佩三千一樓玉立中端委瑤琚碾就襄王故國
屈平遺里多少鉛華飛瓊塗抹一時按碎記少年馳逐
銀盃縞帶幾番被雞呼起 冷入重貂如水鬢絲絲嘆

非前比羔兒滿泛獅兒低唱飄風過耳冰釋邊憂春生
民樂歡形佐史倩何人蜚奏五雲天上助吾君喜

醉蓬萊

丁酉春題江州琵琶亭時
自兵間還幕有焚舟之驚

倚欄干一笑舊日琵琶何處尋覓獨立東風吹未醒狂
客沙外青歸柳邊黃淺依舊自春色極目長淮晴煙一
抹不堪重憶老子平生萍流蓬轉昔去今來鷗鷺都
識拍拍輕舟煙浪暗天北自有乾坤江山如此多少等
陳跡世事從來付之杯酒青衫休濕

又

戊子為親庭
壽時方出蜀

是人生好處仕宦歸來享清閑福屈指吾翁恰八年荆
蜀星火叢中風濤局上轉青天芻粟輶傳欣還里閭相
慶雙鬢猶綠為報中朝如今老子肯把貂蟬換取松
菊西舍東鄰正新篳初熟屋僅一椽田姑二頃贖種花
蔣竹緩引金釵細斟瓊掌唱長生曲

又

乙酉壽
蜀帥

把東南溫厚天遣西來試薰風手一佛人間與峨眉長

久玉帳旌旗金城鼓吹笑烏奴歌酒狐兔煙清貌貅月
淡凱音新奏元祐明時中朝司馬記得邊人歲問安
否勲業如今缺公衮沙堤歸來無恙有西湖

花柳更借當年一龜一鶴伴千秋壽

又丁亥壽蜀帥

有擎天一柱殿角西頭手扶宗祐萬里魚鳬倚金城山
立亭障驚沙氍毹裘卷地倏度黃龍磧玉帳從容招搖纔
指頓清邊色見說中天翠華南渡一捷金平膽寒西

賊帝錫公侯更高踰前績箕尾輝騰昂街芒斂看清平
天日周袞歸來鳳池麟閣雙鬢猶黑

又代壽昌州
守叔祖

記石湖佳句為海棠花合來西蜀不道東州更香霏清
淑漢竹光中召棠陰裏想清歡未足少駐旌麾姑留樽
俎待春風曲 見說吾家丹溪老子萬籍名堂孫枝猶
馥南極星邊正魁星明燭五馬歸來一龜無恙訪舊松
新菊從今長伴西山一佛鎮岷江綠

又壽別
制垣

問江東父老十數年來誰為安石萬里鯨波一柱獨山
立漢橐班高郢片名重喜動旌旗色虎踞龍蟠有人於
此千載猶昔好是元戎護寒舊手到處人傳爭道公
別辦取風檣指顧定南北只恐為霖玉麟堂小留不住
台席一片仁心壽身壽國與同箕翼

又兩午壽
八憲叔

自隴頭垂譜調鼎傳家典刑猶有歲歲芳期報小春時

候仙骨非凡生香不斷標格蕙蘭右江路孤山水邊雪
際為渠詩瘦白玉堂前青氍席上孰謂無人有如此
酒得意東風且占萬花首會看常娥移栽月殿肯向桂
華後應笑家林枯松偃蹇歲寒堪友

又

庚戌壽
章倉

正陽生一脈綉日添長臺雲書瑞勁節昂霄仁意雪霜
裏粟庾紅陳草靡綠茂襦袴藹千里馬熟車輕鈴齋曾
到從容游戲好是邦人能言世美猶愛其常而況其

子洞裏桃花歲月任渠記一點梅梢為傳消息有東皇
知已倚看明年相逢貢轡曳星辰履

六州歌頭

和陳次賈
韻餞其行

桂香深處傾蓋嶺之西雲南外曾指點是蠻靺酌玻瓈
簪帶江山裏揮銀筆搞綺句湖海氣羞蓬弱吐虹蜺回
首煙塵碌碌公家事自笑癡兒盍田園歸去耕釣侶黔
黎月夕花期恣吟題 悵荊州路同北望剡谿興又東
馳雄邊上誇前躅壯新基燦宸奎客問西陲事公莫惜

語教知秋城夢笳鼓騎舞鬪雞休作中年離恨聊拚取
一醉如泥梅邊佳致逸興與逋齊人在蘓堤

摸魚兒

和陳次賈
仲宣樓韻

對樓頭欠招歡伯和風吹老芳訊凭闌面面蒲萄綠依
約碧岑纔寸無盡興縱燃竹烹泉亦自清腸吻憑誰與
問舊城郭何如英雄安在何說解孤憤銅鞮路極目
長安甚近當時賓主相信翩翩公子登高賦局面還思
著緊乘暇整謾課柳評花拔鏡搔蓬鬢江平浪穩悵我

有蘭舟何人共楫毋作孔明恨

八聲甘州

庚戌重九約諸友登龍山阻雨

擬龍山把酒酹西風西風苦無情似秋容不受騷人登
眺特地慳晴依稀兩三過雁何處是方城目斷危樓外
山遠煙輕且對黃花一笑嘆浮生易老樂事難并喚
遏雲低唱簷溜任霖鈴問何如烏紗折角把芳名蓋取
晉參軍東籬下陰晴不管輸與淵明

又

唐成壽鄭丞相

有龐眉扶杖峴山來舉觴壽南山道天憐赤子相逢鈞
播久望甑還幸際君王神武上宰是甘盤少運風霆手
整頓何難好箇霜天時候聽雁門新雁眺遠凭欄想
經綸心上一點炳如丹撫輿圖真儒事了把勲庸留在
鼎彝看八十歲四明洞府一佛人間

可齋雜藁卷三十一

欽定四庫全書

集部

可齋雜藁卷三十一
四

詳校官庶吉士臣吳烜

主事臣呂雲棟覆勘

總校官庶吉士臣倉聖脉

校對官原任典簿臣郭祚熾

謄錄監生臣連彭年

欽定四庫全書卷

可齋雜藁卷三十二

宋 李曾伯 撰

詞

沁園春

丁酉春陪制垣齊安郡園曲水之集

形勝風流樂事良辰一時四并正榆更新火觴浮曲水
那堪上巳又是清明赤壁功名東坡文字俯仰人間無
古今詩書帥對烽烟靜畫俎豆添春水邊天氣催人
便須認楊花雪樣生慨英風滿席思旌綿上清談東閣

肯記蘭亭安得長繩高懸碧落繫住畫簷紅日陰柔桑
外聽鳴鳩喚雨全勝流鶯

又

庚戌為
親庭壽

鴻禧主人一閑半年未嘗厭閑謂有溪可釣有田可耕
有蘭堪佩有菊堪餐羽檄秋風胡笳夜月多少勲名留
漢闕如今且微樽疊北海歌舞東山門前咫尺長安
但只恐綸音催禁班把鷺鬢數莖更因民白鷗心一片
猶為君丹藍綬兒癡綠衣家慶倦羽伶俜江漢還春光

小看庭闈歲歲一笑梅間

又代為親
庭壽

軒冕儻來功名盃水行藏倚樓把方畧評梅工夫課柳
精神伴鶴談笑盟鷗草檄尋樵移文問釣任江上東南
風未休君知否問如今綠野勝似青油從伊萬戶封
留算得似團樂歌笑不怕魏闕興思高車駟馬江湖難
著緩帶輕裘雪意何如新醪熟未樂事良辰聊獻酬從
今去更八千椿算纔一春秋

又代壽直院
陳文昌

今代清流北斗以南文昌一星對露門進讀鑾坡演翰
瑣闥批勅瑤牒成文筆下權衡胸中律度禮樂人才供
討論駕行裏羨才高片玉輝映條冰幾年簡在吾君
便須把詩書開太平笑諸公炙手昔成何事一賢冷眼
今獨修名花底退朝槐邊聽制一武商巖霖雨新金壘
舉對春風九十歲歲平分

又乙未代壽
尤制帥

天下中庸千載一燈傳之自公有涵洪雅量陂澄千頃
堅凝定力壁立孤峯佐鼎調梅參帷借箸略試斯文經
濟功聽淮鶴暫素絲攬轡玉帳分弓 朝來鼓角聲雄
慶元帥新除初度逢任西風局面人皆頌洞福星堂上
我獨從容草檄傳燕開門釋蔡了却中原公衮東歸廊
廟把格天勛業與宋無窮

又壬寅餞余
宣諭入蜀

畫舸呼風長劒倚天壯哉此行指洞庭彭蠡徧觀吳楚

瞿塘灩澦直上峨岷帝語春溫軍聲秋肅手濟時屯開
泰平天應是念蠶叢父老公為更生 眼看四海無人
今天下英雄惟使君想馳情忠武將興王業撫膺司馬
忍外吾民淨洗甲兵歸來鼎輔定使八荒同一雲經營
事比京河形勢更近函秦

又

庚子登鳳凰
臺和壁間韻

漫浪江頭三聽秋砧一登故臺望烟蕪莽蒼令人目斷
風檣掀舞何日眉開把酒新亭園基別墅老氣當時何

壯哉江東事百年無恙全是時才
紛然競付輕埃還
水遶賓心東向淮嘆阿奴儕輩因人碌碌迺翁材畧餘
地恢恢鳳闕天高鷺洲潮落約取白鷗歸去來闌干外
英雄陳迹一酹瓊盃

又再和

綺閣香銷玉砌夢殘淒涼舊臺對御溝紅葉一番木落
宮牆黃菊幾度花開水遶岷源山聯吳會目送征鴻安
往哉都休問六朝人物誰拙誰才
平生袞袞煙埃記

疋馬當年荆蜀淮嘆凋零殆盡詞源已竭消磨未去酒
量猶恢八跪蟬肥四腮鱸美客有可人招不來油幢暇
凭闌一笑相與傳盃

又

和廣文叔有季秋
既望之約不及赴

目斷長空手拍危欄高興酒濃擬招呼短艇追陪飛蓋
一餐湘菊共賦芙蓉雁字沉秋鴉林噪晚幾陣蕭蕭雨
更風空凝佇不如一鶴隨意西東堪嗟樂事難逢愧
元伯巨卿千里從望文星聚彩交輝吳分天飈吹起獨

隔崑蓬野墅荒烟敗荷衰草人在可憐憔悴中還相念
願持觥薄罰別許從容

又

自和
即事

雨抹晴粧修眉鏡清寸碧翠濃對蕙蔭盡處叢叢烟樹
池塘側畔面面芙蓉千百棲鳥一行過雁時有婆娑
一笛風斜陽裏更青帘半捲在小橋東佳人何日重
逢問還肯扁舟載酒從笑平生勁槩寸心如鐵中年老
態兩鬢成蓬荷鋪栽蔬腰鐮刈稻且寄西郊圖畫中空

回首望五湖鷗鷺心事容容

又再和

秋豈悲人人不悲秋比春更濃有蕙蘭丰度尚存芳菊
牡丹文獻猶在芙蓉舉蠚持醪得鱸作鱠晉宋間人有
此風休輕笑彼柴桑傲吏齷齪籬東携壺與客還逢
願時許先生杖屨從嘆塵蹤如寄鷗鳬江海性真聊適
蝸鷗蒿蓬刮眼青天驚心黃葉立盡梧桐月正中淒然
久看物情終竟不似春容

又

甲辰餞尤木
石赴九江帥

大江之西匡廬之陰壯哉此州有舳艫千里旌旗百萬
襟喉上國屏翰中流彈壓鯨波指麾虎渡着此商川萬
斛舟青瓊舊看敦詩說禮緩帶輕裘十年泉石優游
久高卧元龍百尺樓正九重側席相期巖弼一賢砥柱
聊試邊籌了却分弓歸來調鼎得見茂弘何復憂談兵
暇問琵琶歌曲無恙還不

又

甲辰壽
王總侍

北固臺端南渡後來無此偉人自從容佐昂光華攬轡
幾年中外屬目經綸萬竈炊煙千艘漕雪手整江淮如
掌平詩書效看馬騰士飽酒好兵精平生餘事功名
豈管葛諸人能擬倫暫牙籌游戲小淹惟月金甌注想
便合為霖沆瀣一襟風流八詠秋入詩壇如許清為公
壽有黃花不老長伴香名

又餞鄧季
謙赴班

攬秀岷峨著鞭江淮諸公所奇對塞垣煙淡相隨弓劍

城樓月落幾共燈棊驛柳搖黃溪桃漲綠穩赴春風度
玉墀亭衢去看紫薇紅藥太乙青藜孤山若放梅時
莫忘却揚州曾有詩悵莫游難駐堪憐隻影中年易感
祇付雙眉珍重交情勉旃時用回首岫雲從此歸能相
憶有好音遺我在水之湄

又

餞稅
巽甫

唐人以處士辟幕府如石溫輩甚多稅君巽甫以
命士來淮幕三年矣畧不能挽之以寸巽甫雖安

之如某歉何臨別賦沁園春以餞

水北洛南未嘗無人不同者時賴交情蘭臭綢繆相好
官情雲薄得失何知夜觀論兵春原弔古慷慨事功千
載期蕭如也料行囊如水只有新詩歸兮歸去來兮
我亦辦征帆非晚歸正姑蘓臺畔米廉酒好吳松江上
蓴嫩魚肥我住孤村相連一水載月不妨時過之長亭
路又何須回首折柳依依

又

丙午登多景樓
和吳履齋韻

天下奇觀江浮兩山地雄一州對晴烟林翠怒濤翻雪
離離塞草拍拍風舟春去春來潮生潮落幾度斜陽人
倚樓堪憐處悵英雄白髮空敝貂裘敵淮頭水尚咽流
誰為把烏檣付石尤問只今人物豈無安石且容老子
還訪浮丘鷗鷺眠沙漁樵唱晚不管人間半點愁危欄
外渺滄波無極去去歸休

又

丙午和淮安朱贊府韻以同在
丙寅安陸園中朱八十餘矣

紫金山前鐵騎圍中惟公尚知悵當時北角魚猶同隊

如今縞鬢鷗已忘機故壘荒榛羣賢拱木疇記官軍夜
戰時不圖見獨歲寒不改老氣猶奇嗟哉月駛舟移
四十載光陰昨夢非嘆荷薪弗克抵慙弓冶局柴却掃
絕望簪圭菌短椿長鷗微鵬巨天分當然何足疑聞公
里有礪溪堪釣盍亦云歸

又
丙午壽
常丞叔

大疏歸來小阮適閑喜同此時問垂弧歷載幾番遙祝
舉觴華旦相會良希頌以松椿酌之椒柏預卜明年百

事宜春猶淺趁雪晴梅放且和新詩 公雖厭直蘭闥
如正色朝端當寧知看大廷諸老爭推前席吾家五祖
自有傳衣暖律初回要津立上卿相時來皆可為祈公
壽與東君不老南極齊輝

又
庚戌初
度自賦

孤矢四方江漢一萍少年壯游嘆而今老矣祇宜野服
欲何為者還著輕裘匹馬蕭蕭孤鸞杳杳城郭重來空
白頭西風裏對一番新月又荻花秋 依然千古荊州

問劉表諸人還在不向亭前舉酒不堪北顧船頭擊楫
忍負中流遠水長天淡烟衰草還是當時王粲樓何如
且倩吳歌楚舞一洗新愁

又

月夜
自和

嗟矍鑠翁對嬋娟月懷汗漫游悵江湖興有季鷹鱸膾
田園忍負晏子狐裘丹桂開時青蘋渺處家在三吳天
盡頭庭臯靜又一番葉落天下皆秋少年弓劍邊州
驚轉首黃梁還夢不嘆悠悠千載關山無恙涓涓一水

歲月俱流鏡晃菱花殆悲蘆葉新雁數行人倚樓君知
否把眉峯蹙破豈為身愁

又

中秋約僚佐觀擊
圓登懷遠用前韻

喚麴生來與嫦娥約從太守遊把玉簫聲寄蕭闌短笛
霓裳曲換清塞重裘桂影飄搖桐陰立盡多少征人霜
滿頭油幢暇不掀髯一笑辜負中秋斗杓矗處中州
還有解聞雞起舞不看鳴弦中鵠穿楊電激飛球戲馬
策筵星流繡帽歸軍玳簪環客薄晚同登庾亮樓浮生

事是幾番翫月何苦多愁

又

以雨不克
登樓用韻

麴生來言素娥寄聲偶闌苑遊問去年今夕逢余桂嶺
前年今夕見子菟裘何事塵勞啓人厭倦癡兔老蟾因
縮頭宜珍重要相期後會直待來秋 休休莫舞涼州
豈巫女風姨相妬不枉停歌準擬冰輪東上持盃顧戀
銀漢西流一笑天慳四并時少應負珠簾十二樓呼蕉
葉且與生酹古排遣牢愁

又餞總幹
陳公儲

百尺樓頭奇哉此翁元龍後身當壯年襟度百川鯨吸
平生出處一片鷗輕冷淡逋梅淋漓旭草但見風雷筆
下生荊州幙覺坐間小異乃有斯人牙檣喜色津津
正江影涵秋無點塵對白蘋黃蓂且供詩卷紫薇紅藥
聊演絲綸舉酒延蟾倚欄聞雁應念征人歸尚春君王
問儘不妨細說萬里戎情

可齋雜藁卷三十二

欽定四庫全書

可齋雜藁卷三十三

宋 李曾伯 撰

詞

水調歌頭

甲申春利州漕解詠
月聞琴和周昞仲韻

一段太清境誰幻出堦坳不知身住何處爽氣逼霜袍
但見人間一樣似夜又還非夜棲鳥不安巢認得在塵
世禁鼓二更敲 最快看來竹底上梅梢幾家朱戶不
如兒女醉蓬茅誰把琴聲三弄不管騷人幽趣似向曲

中嘲長嘯賦赤壁有酒更無肴

又再和

夜永厭銀燭移步下堂坳秋風昨夢少年高興鵲成袍
世上癡兒睡去歷歷江山細數孤鶻嘯危巢地靜未容
去門掩不妨敲轉巍闌低畫桷落寒梢南樓老子爭
似短笛一椽茅無色界間長嘯不夜城中高卧隨意弄
詩嘲洗竿要更酌為我問佳肴

又丙戌壽
蜀閬

千一載英傑百二國山河提封幾半宇宙萬里伏天戈
十乘晉軍旗鼓三歲秦關扃鎖地利屬人和位次功第
一未數鄼侯何建青油持紫荷聽黃麻乾坤整頓都
了玉殿侍羲娥且醉東湖花柳却泛西湖舟楫留不住
岷峨誰為語儒館濃墨被詩歌

又代壽昌州
守叔祖

三蜀最佳處昌是海棠州清香燕寢間暇人與地風流
十萬人家壽域六七十翁兒狀眉壽祝公侯誰為語廊

廟且許冠恂留 過書雲纔幾日紀千秋祖孫卮酒相
賀慶事襲箕裘自有詩書萬卷安用田園千頃松菊足
優游持以壽公者梅萼伴清修

又

丁亥重陽登益
昌二郎廟樓

老子世比客家本住吳頭登臨聊復爾耳佳節懶為酬
剛被西風斷送又為黃花牽帥草創作斯遊目力眇無
際更上一層樓 對長江流不盡古今愁憑欄正擬一
笑襟抱怯於秋高處令人心悸放曠舒懷何暇好趣醒

時休留取江湖量歸去醉中州

又

丁亥送方
子南出蜀

行客送行客況又值新秋尊鄉此去萬里先我上扁舟
三載烏奴聚首異縣鄉情對語乘月幾登樓去去遠蜀
口日日望吳頭丹青手描不就此離愁半生萍梗江
漢別恨最綢繆遠水長空一色秋盡波平如掌雁序際
天遊故舊有相問猶滯劍南州

又

乙未沿檄
過潁壽

驟雨送行色把劍渡長淮西風咄咄怪事吹不散煙霾
才是橙黃時候早似梅邊天氣寒意已相催老子尚頑
耐僕馬若虺隤嘆平生身客路半天涯飛鳶跼跼曾
見底事又重來回首白雲何處目送孤鴻千里去影為
徘徊籬菊漸秋色社甕有新醅

又
和吳鶴林舍
人送楊帥韻

萬里長淮北青是漢時山幾年壁壘相望高枕度春閑
不道草廬豪傑手袖伊吾長劍馳志在樓蘭鐘鼓今秋

肅瓊蜀膽冰寒 詩書帥金橫帶玉為鞍天生如結數
輩敵豈易江南京索成臯此際東郭韓盧俱困故老正
爭看琳檄未能草馮鈇直空彈

又 庚子壽制
閩別尚書

峴山羊叔子江左管夷吾勲名掀揭宇宙金匱移丹書
兩載風寒卧護一柱狂瀾屹立形勢壯陪都功業笑兒
輩別有大規模 看東歸遊鳳沼轉鴻樞不應廊廟人
物猶佩玉麟符好是茅峯仙客更與鍾山佛子同日慶

垂弧一飲共千歲永永輔皇圖

又

庚子送周昞
仲赴江東幙

簪履盛元幙領袖屬英游登車攬轡餘事何止客諸侯
看盡巫雲岷雪却訪廬峯湓浦砥柱贊中流百疊青山
路一片白蘋洲今日事風濤上一虛舟長江萬頃寒
碧猶謂馬能浮況是眼前局面心腹憂如邊角勝著賴
帷籌談笑濟時了勲業邁前修

又

辛丑送胡子
安赴遠安

風捲江湖浪舉足是羊腸峽山知在何處
榛莽更淒涼
不為淵明五斗直為班超萬里雅志未能忘
耿耿富襟抱行計有詩囊
溯吳頭逾楚尾界瞿塘從它昵昵燕語
留不住征檣芳草天涯彌望著我飛鳬來
去在在可徜徉持此見劉表抵掌與談王

又
甲辰中秋和
傅山父韻

幻出廣寒境羅襪淨無塵素娥風格分明
玉骨水為神
手攬清光盈掬眼看山河一色閱盡古今
人對影且長

嘯一酌甕頭春 千萬頃琉璃色 楚天清庾樓袁舫何
事汨汨主和賓 但見老蟾無恙 不管鏡圓鉤闕寒暑任
相更此夕幸無雨 何惜放顏醺

又

幙府有和
再用韻

碾就一輪玉 掃盡四邊塵 白乎不涅不磷 千古此丰神
領畧常娥體態 寂寞謫僊材 調四海 豈無人安得金丹
訣 長駐玉顏春 鏡圓明 冰樣潔 水來清 良宵難值如
許 何惜且留賓 擬喚桓伊三弄影 轉畫欄 西畔鐘鼓趣

殘更肺腑盡霜雪麴蘖不能醺

又再和

久欲乘槎去間闊幾仙塵乾坤炯炯不夜造化抑何神
誰道二分無賴到處一輪都滿天未始私人今夕果何
夕非夏亦非春風露下明作哲聖之清紛紛浮世代
謝燕客與鴻賓歡恨離愁盡掃謝賦鮑詩高束一枕聽
嚴更爾自屋梁落吾已醉醺醺

又
送制參向
君玉歸里

薄酒長亭別飽飯故園歸兩年婉婉席上甘苦每同之
駉驥羣中獨步麋鹿興前不瞬孰可與爭馳力挽不能
寸健駟遽斜飛經營事艱難狀老天知區區塞馬得
失一笑付觀碁用則風雲萬里不用烟霞一壑兩鬢未
應絲回首烏檣外鷗鳥自忘機

又

乙巳九月壽城獲捷
和傅山父凱歌韻

壁壘壯西塞形勢古州來九重廟算經遠邊隙肯輕開
整頓金城千仞遮護風寒數處蛇豕敢當哉惆悵倚長

劍掃未盡煙埃 騎連營橋列柵木成排敵人魚釜視
我孰與障吾淮橫槊衝圍四出北府牢之何勇新進喜
多才老子可歸矣擊壤樂春臺

又

幙府有和
再用韻

棗頰上秋色羽檄下南來斧塘鋒蝟螭集沉霧掃難開
細看眼前局面驚落人間七筯砥柱者誰哉熊虎賈餘
勇狐兔等輕埃 砲雷轟戈日耀陣雲排不圖風定波
息談笑靜長淮休說穿楊妙手乘早闌籃抽脚誰拙又

誰才東起樓蘭劍歸釣子陵臺

又

戊申和八牕
叔為壽韻

壯志小鵬背萬里欲乘風馬瘠裘敝老來無復舊遊重
楚尾吳頭蜀口三十載間陳跡衮衮水之東休說射鵰
手且學釣魚翁奚為者聊爾且此山中壺觴自引不
妨換羽與移宮蓬矢桑弧何事朝菌大椿皆分識破色
俱空掬潤弄明月長嘯倚看松

又

再和

鴻雁未應到可怪此番風木樺天氣何事與逼夾衣重
長記呼韓塞下每向飛廉聲裏占見馬蹄東今且閉門
睡都不管山翁李北平班定遠魏雲中紛紛成敗任
取勲業紀南宮幸得明朝無雨定是中宵有月莫放酒
尊空起舞美庭葉清影伴巖松

又招八牕叔
托疾再和

一番蓼花雨幾陣桂枝風杖藜多暇準擬同醉小山重
底事阮郎清致苦托休文瘦損咫尺阻西東秋色浩如

許豈可欠詩翁 門前事都莫問付盃中紛紛蠻觸等
耳富貴大槐宮何惜振衣而起相與凭欄一笑抵掌共
談空佳客倘不至推枕卧雲松

又

戊申送厲守
赴濡須漕

締好恨不早覲面雅相知璿星樓上一見天產此英奇
功在淮梁砥柱政藹漢扶襦袴僅借冠帽暮懷惱劍花
冷手欲鱸鯨鮓 濡須塢咽喉地腹心誰公其攬轡憑
軾勲業笑談為貫索旄頭息焰斗極泰階動色歸佐太

平基客有問僕者只說在漁磯

又已酉宿棹
原驛得雨

之子問行役火傘正當天酷哉幾可炙手流汗滿襟沾
僕僕長亭道古人在竹輿何似甌釜受蒸煎帝憫蒼生
熱勅下九龍淵命豐隆驅屏翳起蜚廉神工一炊黍
頃爽氣遍垓垓洗滌山河塵土轉作清涼境界物類舉
醒然稽首謝天賜伸脚快宵眠

又題臨江驛和
徐意一韻

君莫厭行役易爾此非難人情無已久陰憂潦霽憂乾
借得庭軒一榻忘却征塗炭暑小駐淪龍團世路任渠
險襟抱五湖寬嘆平生環轍跡已蒼顏梅花雪片萬
里奚又繫南冠應是江山好處猶待推掛老眼天未許
休官莫憶故園竹日日報平安

又庚戌壽
靜齋叔

喬木老盤谷仙李盛峨岷參橫井轉月邊猶賴有長庚
傳得丹溪正派更是平庵宅相夷路早蜚英十載星沙

幕一片玉壺冰 題與了千萬里盡雲津渚宮小駐不
妨談笑對秋城西去憑熊駕駟東下握蘭持橐袞袞看
崢嶸願借鷺峯桂歲以壽金觥

又

辛亥中秋和陳
次賈用坡仙韻

萬里淨無翳一鏡獨當天老蟾癡兒頑甚閱世幾何年
任爾炎涼千變不改山河一色爽氣逼人寒何必乘槎
去直到斗牛間 歎常娥元不嫁只孤眠古今遺恨不
能長似此宵圓我有竹溪茅舍辨取金風玉露一笑四

并全細和坡僊句低唱勸蟬娟

可齋雜藁卷三十三

欽定四庫全書

可齋雜藁卷三十四

宋 李曾伯 撰

詞

滿江紅

丁丑登均
州武當山

鎮日山行人倦也馬還無力遊歷處總堪圖畫足供吟
筆澗水綠中聲漱玉嶺雲白外光浮碧信野花啼鳥一
般春今方識真可羨林泉客真可嘆塵埃後想希夷
冷笑我曹蹤跡七十二峯神物境幾千萬壑仙人室待

身名辦了却歸來相尋覓

又

甲申春侍親
來利州道間

袞袞青春都只恁堂堂過了纔解得一分春思一分春
惱兒態尚眠庭院柳夢魂已入池塘草問不知春意到
花梢深多少花正似人人小人應似年年好奈吳帆
望斷秦關聲杳不恨碧雲遮雁斷只愁紅雨催鶯老最
苦是茅店月明時雞聲曉

又

甲申壽
蜀閬

天顧坤維煩紫氣來從南斗鞭纔定匆匆塞上詠微吟
柳少借日邊霖雨望教知天下風雲手聽吾民爭說近
年無前朝有 平安夜舒長晝笳鼓靜笙歌奏記西湖
五月藕花時候待把雁門冠帶了歸來麟閣丹青舊放
蜀山萬點入樽罍為君壽

又

甲午宜興賦
僧舍墨梅

姑射山人仙去後唯存標格猶賴有墨池老手草玄能
白留得歲寒風骨在豈煩造化栽培力有世間肉眼莫

教看非渠識 元不夜枝何月元未牘花何雪最孤高
不受多情輕折只有暗香天靳子黃金作指難為術更
若將解語付真真空成色

又

丁未初
度自賦

老去生涯都付與一丘一壑功名事慙非好手幾逢危
著走馬鬪雞年少趣推牛醺酒軍中樂到而今渾似夢
中看休休莫 江湖路西風惡霄漢志秋雲薄更那堪
州鐵鑄成重錯當貴買臣毋足羨知非伯玉真能覺問

心期應有海翁鷗山人鶴

又八牕叔和
再用韻

竹馬同游平生志相期霄壑今老矣儒冠寧誤戎裝徒
著捲起鯨鯢江海事放教禽鳥山林樂問尚看舞劍渡
河無公應莫粟可飯衣從惡秫可酒茶勝薄但此身
長健老天不錯行院晝閣參內景蒲團夜坐披圓覺願
此生無愧北山猿西湖鶴

又再和

小小池亭髣髴似洛川巖壑天付與老身游戲餘生喫
著賸喜酒能消世慮翻疑書解妨人樂聽兩翁白雪寄
新詞愁言莫 毋自嘆蒿萊惡甘自味齏鹽薄對亂花
叢竹翠紅交錯元亮悅聞親友話羲之常恐兒曹覺望
碧雲休憶女乘鸞人騎鶴

又再和

既作閑人便應付此身溝壑不應更將愁半點寸心中
著責子淵明徒自苦憂君范老何時樂縱一嘲一詠欲

奚為何如莫不自鄙葵蔬惡還肯薦茅柴薄任侯門
海陸雜陳珍錯有暇盍聯車騎過相忘勿遣詩情覺怕
家僮無處買蓴鱸烹琴鶴

賀新郎

甲申代親庭送
淮菊坡出蜀

萬里歸朝去倚江亭綠波碧色一川晴絮羸得威名留
草木玉壘雪山高處未應減平淮裴度見說金甌書字
久待公來便作商巖雨休忘却蜀都賦旌旗回首春
城暮聽檣頭飛燕似把人情低訴兩兩三三鷗鷺裏拍

拍船兒一羽算惟有清芬載取百萬人
家兒樣戀恨柳風不為留連住離夢
遶沙隄路

又已丑為
親庭壽

滿酌荊州酒望萊庭斑衣拜祝俾
吾親壽玉水雪樓游宦地近訪甘
棠依舊逢父老頌聲盈口爭道蜀
邊勞數載也真宜略伴雲橫岫小
兒輩任成否東皋十月梅開後想
親友團樂一笑從容觴豆塞上弓
刀成底事不
過腰金如斗算不直淵明株柳只
恐鯨鯢無計取更須

煩綠野持竿手著勲業國長久

又

庚戌和薛制
參賦雪韻

將謂霏微雨恍朝來虛簷生白寒侵冒絮擬和鹽花凌
謝韞巧思翻成金注誰寄我雪車冰柱釀熟羊羔爐擁
獸羨畫樓金帳調宮羽人應共回風舞園場校獵淮
雲暮記當時銀杯縞帶網禽且兔老去不禁鞍馬力獨
對愁吟似甫問一棹剡溪何處願與鐵衣春解戍把梁
園舊話供兒語孤梅外夢魂度

又再和

纔過黃花雨，問長堤依依萬柳。未春何絮，一目河山銀
幻出。驚詫夜光流注，魏觀蠹玉為雲柱。風捲寒蘆迷過
雁，渺滄波莫認沙鷗羽。千萬蝶空中舞。霸橋寂寞前
溪暮。聳詩肩霜裘推路。月毫揮兔，記得梅奴曾索笑解
珮。如逢交甫，今孤壘寒煙深處。休說鵝池平蔡事，慶新
年一稔驩相語。持大白勿虛度。

又
辛亥初
度自賦

幸得閑中趣問何為修踰桂嶺重來荆渚喚醒門前弧
矢夢鈎月相輝初度謾羞聽軍中鼙鼓馬上弓刀成底
事僅平明旆入襄州去能不愧古羊杜此生何以酬
明主悵新來鬢毛添白衰容如許三萬貔貅齊賈勇好
為一清狐兔看柳色大堤如故世事付之盃酒外那碁
邊得失都休語來共看雁兒舞

念奴嬌

壬午歲
州道間

黃梅過雨望隔林一縷長烟浮碧
亟擁征鞍尋午夢卧

看青山排闥掃戶風清拂簷雲淡爽氣生蕭髮黃梁驚
覺子規枝上啼徹堪羨麥熟蠶成酒香雞嫩風味農
家別幸有佳山供活計何苦江湖南北菊化陶園瓜荒
邵圃空負千時策洛陽三頃勝如金印六國

又見鄭文昌
於上栢

平生宦海是幾番風雨幾番霜雪綠野來歸身強健鏡
裏微添華髮劍束牀頭書尋架上富貴輕於葉南坡石
竹年來尤更清絕好是梅塢松關對湘溪一曲翠屏

千疊柱杖簾輿詩卷裏尚小東山勲業只恐鷗盟難忘
鶴怨未是閑時節片雪收却照人依舊明月

又

丙午和朱希真
老來可喜韻

云胡不喜得抽脚簾中安身局外世路風濤都歷遍幾
度眉攢心碎八尺藤床二升粟飯方寸恢餘地翻雲覆
雨從伊造物兒戲不見刻木牽絲雞皮鶴髮弄罷寂
無事隨分風光堪領略聊放踈狂些子劉項雌雄跼顏
修短無彼亦無此茅簷高卧不知春到花底

又已酉振鷺驛
和黃茶坡韻

浮生如寄嘆征塵驅我擔簦西去烟嶂雲屏相迎送幾
幅鵝溪縑素揮汗流金飲冰漱玉桃葉呼前渡若將有
意道傍一鷺延佇細讀壁上龍蛇大丘筆在更著茶
坡句樽酒十年今白髮不改江流東注勝概難逢旅懷
易動信美非吾土恨無六翮長風萬里高舉

滿庭芳
丙午登多景樓
和王總侍韻

浪拍金鼇春浮鐵甕氣清天朗如秋江皋無事飛蓋強

追游萬頃葡萄光裏風檣共塔影悠悠人間事年華似
柳一水與俱流 綢繆千古恨紛紛離合晉宋曹劉望
長安何處落照西頭往事蒼苔陳跡夷吾在吾屬何愁
清樽畔誰能為我一曲舞梁州

又
丙午宜
興山間

山接平蕪烟橫遠墅修眉淡抹晴粧菊梅交際天未十
分霜幾許無窮秋思空凝竚衰柳斜陽溪頭路黃蘆一
片鳬雁兩三行 平章風景似畫圖一幅著我徜徉山

中無事聊爾適吾狂不用登臨感慨青帘外新酒堪嘗
何為者東家宋玉千古嘆淒涼

瑞鶴仙

戊申初
度自韻

百年過半也悵壯心零落鬢星星也風兒漸涼也近中
秋月兒又初生也田園暇也矍鑠哉是翁也記當時弧
矢垂門辜負四方志也休也牙籤挿架玉帳持麾搃
成非也浮生夢也皇皇欲奚為也趁身閑隨分簷衣淡
飯一笑又何妨也問神仙底處蓬萊醉鄉是也

喜遷鶯

乙未中秋同諸北客
翫月於潁州之南樓

輕雲暮捲望澄空如水千里一碧菱鏡冰懸桂輪玉碾
喜見中原秋色老蟾炯炯無翳閱盡塵寰今昔堪恨處
度霓裳曾到長生宮闕坐客休嘆息看此清光天豈
限南北便好乘風為持玉斧修取山河如一西湖舊時
花草會遣嬌娥重識從今去舉太平翫事長如今夕

聲聲慢

賦紅梅

紅綃剪就絳蠟鎔成天然一種仙姿竹外家風淒涼儉

薄為宜東君苦憐消瘦強教伊傅粉勻脂較量盡勝天
桃輕俗繁杏麤肥 好是新粧雅態對踈蟬淡淡薄霧
霏霏迥出紅塵輕盈玉骨冰肌猶嫌汚人顏色誰云似
號國娥眉香韻別怕滿園蜂蝶未知

又

和韻賦
江梅

修潔孤高凌霜傲雪瀟然塵外丰姿一白無瑕玉堂茅
舍俱宜飄飄羽衣縞袂都不染富貴膏脂調羹事看水
邊清瘦雨後紅肥 偏愛春工尚淺向南枝信透東閣

香霏翠袖猶寒不禁弱質柔肌渾如故人邂逅聊相與
一笑開眉歸去晚任簾櫳深閉未知

青玉案

癸未
道間

棲鴉啼破烟林暝把旅夢俄驚醒猛拍征鞍登小嶺峰
回路轉月明人靜幻出清涼境馬蹄踏碎瓊瑤影任
露壓中紗未忺整貪著前山雲隱隱翠微深處有人家
否試擊柴扃問

又

丁未壽
八臆叔

去年曾借梅為壽轉眼垂弧小春又一笑巡簷清影瘦
雪邊聊且收香藏白少俟融和透新來東閣高吟就
金鼎家聲自依舊喚取玉妃重舉酒百花頭上一枝芳
信終屬東君手

好事近

甲申春
益昌作

春在粉牆西牆裏不知春色惟有桃花一樹似故園曾
識晚來携客上南樓山外又山隔準擬清明何處問
東風知得

柳梢青

丙戌送陳仁父赴班

萬里青天西來後我先我東歸夜月鞭籌春風幕府鶚
薦爭推 孟行到手休辭道秋菊春蘭有時若到松江
莫驚鷗鷺記取坡詞

虞美人

已亥春卧病於池州天慶觀

韶華只隔牕兒外病起昏於醉花開花落總相忘惟有
夢隨蝴蝶趁春忙 故園芳草應如舊只恨人消瘦擬
憑飛燕語歸期拚却牡丹開了有餘醺

減字木蘭花

丙午和朱
希真韻

無可不可還你天公還我我味觸聲香盡付莊周蝶滿
床 瞞天不過留取心機休用破淨几明窓樂取閑中
日月長

又再和

如何則可我亦不知其謂我隱几焚香對酒一壺書一
床 知仁觀過渾沌翻瞬誰鑿破寄傲南牕堪羨淵明
滋味長

西江月

宜興山間即事

不暖不寒天氣無思無慮
山人竹窓時聽野禽鳴更有
松風成韻
竟日蒲團打坐有時藜杖閑行
呼童開酒薦盃羹欲睡携書就枕

又再和

排遣新寒有酒追尋舊隱
無人四山朔吹又冬鳴吹送
午鐘餘韻
過眼霜高木落寄心月駛雲行
歸歟閉戶飽藜羹世事華胥一枕

唐多令

唐成六月赴
荆閫宿江亭

楓荻響颼颼長江六月秋二十年重到沙頭城郭人民
那似舊曾識面兩三鷗落日且登樓英雄休涕流望
黃旗王氣東浮借問烟蕪蒼莽處還莫是古襄州

點絳脣

辛亥餞陳
次賈歸

懶上巍樓楚江一望天無際漫遊萍寄莫挽東流水一
片秋光直到山陰里人還記戍邊歸未更憶鱸魚美

摸魚兒

送竇制幹
赴漕赴班

趁西風且登黃鶴揮毫先奏秋賦燕山桂種清芬在人
物翩翩如許堪羨處長安近蟾宮相繼金門步佳哉盛
舉看精淬龍泉厚培鵬背自此要津去 荊州事多辛
鄉情相予幾番燈柝基墅轉頭江濶輕帆速夢入吳松
鷗鷺君記取舊王粲曾言信美非吾土故人相語為細
數艱難滿頭雪白無奈戍邊苦

又

壬子
初度

對垂弧引觴一笑淒涼薄分天賦丁年馳騫弓刀後報

國孤忠自許堪嘆處今老矣強顏猶踵邯鄲步安能遠
舉漫目送征鴻夢勞蝴蝶無計便歸去清閑福舊說
天公靳予何時松菊村墅生非燕頤鳶肩相豈是觚稜
鵝鷺收拾取休直似文淵定遠空懷土阿戎可語待乞
得身還屏伊世累甘受作詩苦

朝中措

送管順甫赴漕

少年隨分賦鸚洲得意桂花秋今日送君行色夢和月
到南樓林名仲父辭華季子香滿南州勉力中流擊

揖吾須連釣鰲頭

齊天樂

壬子和陈次
賈為壽韻

今年塞上秋來早
昂街尚餘芒曜舉目關河驚心弧矢
顧我豈堪戎纛幾番鳳詔愧保障何功恩隆旒藻笑指
呼鷹露花煙草憶劉表頭顱如許相與歲寒猶賴有
白髮公道對月懷人臨風訪古往事淒涼難考何時是
了莫馳志伊吾貪名清廟松菊歸來嵇山招此老

八聲甘州

壬子餞帥
機沈好問

正萼鱸佳夢繞吳鄉
牙樯忍輕離向仲宣樓上凭高舉
酒幾共燈檠曾記少陵留詠出幙合持麾飛蓋長安去
華貫平躋好是倚門迎笑恰野堂雲壑菊梅後時慶
鳳雛新長携手奉萊衣撫孤松絕勝細柳念征人徒老
玉關西歸來也幅巾藜杖辦取追隨

又
壬子九日約諸
幙客游龍山

領青油車騎出郊垌
來遊晉龍山喜水天澄霽稻畦鎌
淨榆塞戈閑登高謾醺佳節一笑破蒼顏
騰泛茱萸菊

孟莫留殘 休說參軍往事意當時凝眺不到長安賴
座間小異豪氣躍塵寰到如今祇成佳話記封姨曾薦
衆賓懽吾曹事有如此酒要共彈冠

又自和

悵浮生俯仰迹成空依然此江山對秋容如畫天長雁
度水濶鷗閑追游未甘老態憑酒借紅顏歸騎斜陽外
柳老荷殘 幸對黃花時節喜賓朋晤語烽火平安僅
風巾一笑名尚滿人寰要流芳相期千載肯區區徒戀

片時懽姑聊爾招呼楚調慰藉南冠

滿庭芳

壬子謝呂
馬帥送鱉

八足橫戈一身裹甲將軍致爾來前呼僮解縛亟薦澤
虞鮮族類橫行草地今駢首鼎鑊連連荆江上不圖霜
後風味似吳天晴川千里外分甘遺遠多謝勤拳對
香棖新酒一洗腥羶慰我吟情歸思都忘却張孟鱸鮓
持螯了老饕作賦佳話楚鄉傳

可齋雜藁卷三十四